

四庫全書

集部

欽定四庫全書

集部
御定歷代賦彙卷八十一

詳校官檢討臣劉 忻

主事銜臣徐以坤覆勘

總校官編修臣王燕緒

校對官編修臣盧 遂

謄錄監生臣呂爾禧

欽定四庫全書

御定歷代賦彙卷八十一

室守

超然臺賦

有序

宋蘇轍

予瞻既通守餘杭三年不得代以轍之在濟南也求為
東州守既得請高密其地介於淮海之間風俗朴陋四
方賓客不至受命之歲承大旱之餘孽驅除螟蝗逐捕
盜賊廩卹饑饉日不遑給暮年而後少安顧居處隱陋

無以自放乃因其城上之廢臺而增葺之曰與其僚覽其山川而樂之以告轍曰此將何以名之轍曰今夫山居者知山林居者知林耕者知原漁者知澤安於其所而已其樂不相及也而臺則盡之天下之士奔走於是非之場浮沉於榮辱之海翫然盡力而忘反亦莫自知也而達者哀之二者非以其超然不累於物故邪老子曰雖有榮觀燕處超然嘗試以超然命之可乎因為之賦以告曰

東海之濱日氣所先歸高臺之凌空兮溢晨景之潔鮮
幸氛翳之收霽兮逮朋友之燕閒舒堙鬱以延望兮放
遠目於山川設金罍與玉尊兮清醪潔其如泉奏絲竹
之憤怨兮聲激越而眇縣下仰望而不聞兮微風過而
激天曾陟降之幾何兮棄溷濁乎人間倚軒楹以長嘯
兮袂輕舉而飛翻極千里於一瞬兮寄無盡於雲煙前
陵阜之洶湧兮後平野之漫漫喬木蔚其蓁蓁兮興亡
忽乎滿前懷故國於天末兮限東西之險艱飛鴻往而

莫及兮落日耿其夕
蹉嗟人生之漂搖兮
寄流楫於海
孺苟所遇而皆得兮
遑既擇而後安
彼世俗之私已兮
每自予於曲全中
變潰而失故兮
有驚悼而沈瀾
誠達
觀之無不可兮
又何有於憂患
顧遊宦之迫隘兮
常勤
苦以終年
盍求樂於一醉兮
滅膏火之焚煎
雖晝日其
猶未足兮
竢明月乎林端
紛既醉而相命兮
霜凝磴而
跼蹐馬蹢躅而號鳴兮
左右翼而不能鞍
各雲散於城
邑兮
但清夜之既闌
惟所往而樂易兮
此其所以為超

然者邪

超然臺賦

宋文同

方仲春之盎盎兮覽草木之菲菲胡怫鬱於余懷兮悵
獨處而無依陟危譙以騁望兮丘阜推姜而參差窮莽
蒼以極視兮但浮陽之輝輝忽揚飈以晦昧兮灑氛霾
於四垂躋余心之所行兮欲溷溷其安之蛻余神以遐
鶩兮控沈寥而上馳闢曖曖以涉瀕洞兮揮霓旌而掉
雲旗導長彗以大矯兮從宛虹之委蛇曳采旒以役朱

鳳兮駕瓊輶而驅翠螭涉橫潢以出沒兮歷大曜而蔽
虧壯萬里以一息兮俯九州而下窺有美一人兮在東
方去日久兮不能忘凜而潔兮岌而長服忠信兮被文
章中皦皦兮外琅琅蘭為襟兮桂為裳儼若植兮奉珪
璋戢光耀兮秘芬芳寶世用兮斯卷藏遊物外兮肆猖
狂余將從之兮遙相望回羊角兮指龍肱轉嶠夷兮蹴
扶桑倚泰山兮聊徜徉下超然兮拜其旁願有問兮遇
非常勿掉頭兮告以詳使余脫彌天之網兮解逆物之

疆已而釋然兮出有累之場余復僂僂兮來歸故鄉

超然臺賦

有序

宋張耒

或有疑於超然曰古之所謂至樂者安能自名其所以然邪今夫鳥之能飛獸之能馳與夫人之耳目手足視聽動作自外而觀之者豈不為以大樂乎然鳥獸與人未嘗以為樂也古之有道者其樂亦然又安能自名其所以然邪彼方自以為超然而樂之則是其心未免夫有累也客有應之曰吾豈以子之言非邪吾方有所較

而後知超然者之賢也予視世之賤丈夫奔走勞役守
塵壤握垢穢嗜之而不知厭而超然者方遠引絕去榮
觀萬物視世之所樂不動其心則可不謂賢邪今夫世
之富人日翫其金玉而樂之是未能富也忘其所有而
安之是真能富矣夫惟有之是以貴其能忘之使其無
有則將何所忘邪予以謂將忘超然為真超然則其初
必有樂乎超而後忘可能也予以謂樂夫世之樂者乎
然則子亦安知夫名超然者果非能至樂者也賦曰

登高臺之岌我兮曠四顧而無窮環羣山於左右兮瞰
大海於其東棄塵壤之喧卑兮揖天半之清風身飄飄
而欲舉兮招飛鵠與翔鴻莽丘原之茫茫兮弔韓侯之
武功提千乘之富彊兮憑百勝而稱雄忽千年而何有
兮哀墟廟之榛蓬有物必歸於盡兮吾知此臺之何恃
惟廢興之相召兮要必以譽而後止彼變化之無窮兮
嗟其偶在之幾何聊徼樂於吾世兮又安知其他或有
疑夫超然者曰豈其知道而未純曰彼天下之至樂兮

又安能自名其所以然惟樂而不知所以樂兮此其所以為樂之全彼超然而獨得兮是猶存物我於其間客有復之者曰子知至樂之無名兮是未知世之所可惡世方奔走於物外兮蓋或至死而不顧眇如醯雞之舞甕兮又似乎青蠅之集污衆皆旁視而笑兮彼獨守而不之去較此樂於超然兮謂孰賢而孰愚何善惡之足較兮固天淵之異區道不可以直至兮終冥合乎自然子又安知夫名超然者果不能造至樂之淵乎

九華臺賦

元
衮
栢

混元之峰鬱為仙閭霏青駭紅欽崙相扶下垂清溪百
流是趨昔有羽士恍兮承跼衣玄裳其化莫追爰有
堯年之叟植杖戒鉏顧瞻童土式崇墳壚斥幽導奇以
難以除層臺演觀積石為郭拾級以升家林滿圖乃擢
孤芳絜泉廣疏錫名九華葆茲清腴有客泣止披情徐
吁曰登高能賦大夫之職也為我賦諸客曰皦皦凜秋
天風奏竽哀鴻響空寒蟬抱梧脫者如埽縮者如枯落

妍斂英還形太虛存莫可禦去莫可居相彼九華孰為
有渝含章金衡承元坤興弗媚弗私苦心秉愉迴黃抱
素苞含紛敷飛霜溢露言沾其濡獨立養完孰云彼汙
世服姣靚飾脂效姝嗜腥豢醇澣甘芼蕒維爾茹口哆
焉如荼耿持空榛曷知我無叟曰好不可一鷓鴣唧蛆
鉤以為直石以為琚變奪五采睢睢盱盱已或自售適
增詆誣寄懷於言觴至不餘九九默操嗒然遽廬我生
之辰天清景舒庸采以修庶其遂初山空無塵白雲在

裾歸與歸與吾以子為徒與

李氏山園潛珍閣賦

宋蘇軾

襲九淵之神龍
沕淵潛以自珍
雖無心於求世
亦擇勝而棲
神蔚鵝城之南
麓擢仙李之芳
根因石阜以建
宇跨飲江之鼇
鼈岌飛簷與鐵
柱插清江之奔
淪眩古潭之百
尺涵萬象於瑤
琨耿月魄以終
夜湛天容之方
春信蒼蒼之非
色極深遠而自
然疑貝闕與珠
宮有玉函之老
人爭南征其萬
里友魚鰕與蚯
蟻逝將去而反
顧

託江流以投文悼此江之獨西歎妙意之不陳逮公子之東歸寓此懷於一樽雖神龍之或殺終不殺之為仁

蓬萊閣賦

有序

宋王十朋

越中自古號嘉山水而蓬萊閣實為之冠昔元微之作州宅詩世稱絕倡近代張公伯玉三章膾炙人口好事者從而和之獨未聞有賦之者十朋筮仕之初辱為蓬萊客乃者中秋之夕與同僚會飲於茲閣覽湖山之勝翫月於尊俎間即席賦詩諸公皆和既而念之閣不可

以常登一詩不足以盡意遂從而賦焉

王子游會稽客蓮幕登卧龍之山躡巨鼇之閣秀閎千
巖流觀萬壑縱遠目於東州暢幽懷於寥廓於時天高
氣肅秋色平分簪盍良朋把酒論文俯仰湖山懷古傷
今登高賦詩以寫我心周覽城闉鱗鱗萬戶龍吐戒珠
龜伏東武三峰鼎峙列障屏布草木龍蔥煙霏霧吐棟
宇崢嶸舟車旁午壯百雉之巍垣鎮六州而開府東望
稽山思禹之功喬松鬱乎故陵丹青儼於祠宮藏丹書

於瑰穴流遺畫於無窮南目秦望哀秦之過方鏡石以
頌德驕顏色以相賀嗟仙藥之不來俄腥風之已播西
望夕陽送目蘭亭懷王謝之風流感斯文之涕零徒觀
夫茂林修竹銷烟靄而冥冥北望滄海渺其無涯方吳
門之畫龍視越國其如蛇轟雷鼓於一震墟吳國而成
窪訪麗譙之故址第見乎古木之號鴟前瞻鑑湖滿目
雲水嘉馬侯之偉績慕賀監之高軌祠荒兮遺迹半湮
宅冷兮黃冠無幾徒有漁舟賈楫風樵航葦往來乎鷗

鷺之鄉歟乃乎煙波之裏仰瞻高閣翬飛崔嵬俯瞰州宅緬懷高才面無時之屏障家終日之樓臺長湖山之價於几席之上惜斯人之安在哉言未畢客有指斯閣而謂予曰子亦知夫閣之所以得名者乎蓋始於元和才子也以玉皇案吏之尊擁旌麾於千里也蓬萊隔弱水三萬里以筆力坐移於是也齊名有白從事有鞏胸中有萬頃之湖真一代之奇偉也詩草一出遂能發秦望之精神增鑑湖之風采蘭亭絕倡亘古今而莫擬也

子亦讀夫才子之傳否乎姑問訊其從何而來集乎彼而至於此也才子之才固足以起吾子數百年之儻慕才子之所以獲侍玉皇者亦吾子之所喜攻而深恥也夫何惜之有予於是引客之手揚袂而起言契予心諾諾唯唯有是哉有是哉斯人也而至於斯也尚忍言之哉俄而鼓角作於人間明月出於林端妙三弄之梅花爛十分之銀盤釂一觴而徑醉有不盡之餘歡頃之陰雲忽興點綴青天漸山川之蒙龍若有妒乎嬋娟倚危

欄而感槩覺興盡而思旋矣於是相與啜茗於清白之
堂漱齒於清白之泉閱唐宋之題名終夕為之慨然嗚
呼噫嘻死者可作吾誰與歸其無出乎范文正公之賢

悠然閣賦

元馬祖常

舒吾眺之落落兮覲寥廓之無跡會冥冥之遐思兮契
萬品之攸職擬大化而罔象兮悼世德之圉形聿逍遙
而容與兮泊乎游乎太清是有當於吾衷兮表吾廬以
自肆騁余馬於析津兮崇吾屋乎江汜揭高躅於古道

兮追前修其或然偉一世君子兮又贈之以蘭荃曰予
未有知兮何私意之髣髴懿夫子之悠然乎殆及予乎
空谷

對鷗閣賦

有序

明 李東陽

對鷗閣者侍講學士鏡川楊先生繼父志而作也揚之
隲故有閣家徙而閣亦廢先生之父梅讀公從祖父避
地而歸漸復故宅嘗遊川上誦李嘉祐南風不用蒲葵
扇紗帽閒眠對水鷗之句蓋其志欲復茲閣至先生而

成馬東陽從先生官翰林獲觀所自為記又從其弟府丞維貞編修維立及其子員外郎志仁聞茲閣始末為詳乃作賦曰

鏡川先生之作對鷗閣也闢扉其陽設牖於陰乾藩坤
籬山帶水襟遠則雷峰天井石樓木阜錫嶺金莪翠巖
雪竇天童育王驃騎車廄四明中空五馬羣走句餘武
陵之墟聖公隱仙之居左盤右紆莫詳其餘近則金磬
珠潭芝山桃浦北渡南塘蕓湖蓮渚六港兩川十洲三

嶼花迷學士之橋竹暗尚書之墅奇蹤麗蹟不可縷數
於是啟扉而入則飛簾灑地鳴琅戛空鱗瓦動目翬簷
挾風上下轆轤東西冥濛藏虛納秀後與川通開牖而
眺則屏圍畫張澄練秋碧長林落日倒影千尺平田一
綠與望俱極若乃岸芷洲蘭灘蓼汀蘋杞柳櫛櫞而落
蔭巢荷的歷而敷芬鳬鷺為雙灘鴻成羣鳶跼跼以如
墮鮒洋洋而若馴時有白鷗西來載汎載遊既飄揚以
雪舞忽浩蕩而雲浮先生方對客高詠覽物旁撝獨宿

留以延佇若嬰情於彼鷗客有在席者起而問曰何為
其若是也先生曰噫此吾先君子之志也試為子言之
我居揚隲自宋及元傑構連甍有閭嶄然國版受肇家
徒外遷鞠彼蓬藿蕩為荒園百礎星落下沈清淵先君
子嘗憫焉於此矣復芸栖之故地創梅讀之新軒歌越
里之雅調誦唐人之遺篇將拂蒲葵而小憩岸紗帽而
閒眠時度隙景志齋重泉彼鷗何心以歲以年予乃晨
興暮思左相右度木叢嵒嶭石疊犖确十稔交閱七楹

並落幸往志之粗償恨九原之莫作今我與子神游丘壑放意觴酌孰懷厥憂孰享其樂睹羣鷗之在目增一感於茲閣客乃俯而歎曰嗚呼起廢殊地悲歡異時數雖天定業乃人為有始必復靡終弗持先生實勤童子何知然嘗聞之矣談史絕筆遷書繼成祐不作相旦終台衡故周貴述事孔稱揚名先公官不及再命業不過一經存弓裘之舊物慨堂構之餘情今先生身歷霄漢步登蓬瀛文播海宇望隆公卿固將修五鳳於天闕庇

萬厦於蒼生彼美兮一閣惡足以盡先生之經營也哉
若夫志遂功成名完身退行藏有時俯仰奚累知倦鳥
之終還念閒鷗之可對眷斯時之未晚非此閣其焉賴
盖亦有詒盛業於諸孫描清風於百代者矣先生曰我
其圖之子盍為我賦之於時簪纓並輝子弟咸侍左京
兆石太史趨郎官列貢士絃誦間作觥籌交駛客既醉
散鷗亦翔止先生獨居廓思方將合萬物而一視也

清虛子此君軒賦

有序

宋楊萬里

吾友清虛子家有竹軒命曰此君誠齋某為賦之

客有問於清虛子曰昔者子猷愛竹字之曰君謂此君
一日之不可無古之知竹者未有若子猷之勤者歟清
虛子曰子猷可謂愛竹矣知竹則未也古之知竹者其
惟吾夫子乎蓋嘗聞之夫子適衛公孫青僕子在淇園
有風動竹聞蕭瑟檀欒之聲欣然忘味三月不肉顧謂
青曰人不肉則瘠不竹則俗汝知之乎其詩曰瞻彼淇
澳萋竹如簣言念君子溫其如玉吾乃今知竹之所以

清武公之所以盛也蓋君子於竹比德焉汝視其節凜
然而孤也所謂直哉史魚邦有道如矢者歟汝視其貌
頎然而臞也所謂伯夷叔齊餓於首陽之下民到于今
稱之者歟汝視其中洞然而虛也所謂回也其庶乎屢
空有若無者歟故古之知竹者其惟夫子乎子猷非知
竹者也客曰甚哉清虛子之言似夫子也敢賀此君從
陳蔡者皆不及門君何修何飾乃得於四子而同席願
堅晚節於歲寒以無忘夫子之德

拙軒賦

金趙秉文

宣撫移刺公築室於私第榜之曰以告閒閒居士曰余
有拙病似愚而強矯矯亢亢踽踽涼涼人皆喜圓已獨
喜方將適東溟顧登太行將之暘谷反走寒鄉鬼笑挪
揄人怒中傷神醫不能療著蔡不能詳且子以為何如
可愈而康也居士曰拙者自拙吾不知其短巧者自巧
吾不知其長或善宦而九卿或白首而潛郎以俗觀之
有瘼有良以道觀之孰否孰臧較榮枯於瞬息等一夢

於黃梁神龜曳尾大勝剗腸漢陰抱甕焉知沃湯蜂以
蜜而割蚌以珠而戕鉅桓山之石豈若鶻衣之負朝陽
憶上蔡之犬何如羊裘之釣滄浪天道茫茫何有何亡
老龜不爛禍延枯桑魯酒味薄邯鄲被殃吉凶無朕智
不能量鄙夫自私蝨處禪襠達人大觀物我兩忘縱心
浩然與道翱翔言未既公笑曰余病良已謝夫子之愈
膏肓也

榕軒賦

元
袁
桷

南粵之區溫風戛摩積炎吹雲流金為波少負老息盼
茲庭柯爰有弱木攀緣嘉生連理纏結附枝膏凝陰旋
萬牛廣容專城千柱承宇百尋傲空羣焉莫爭希賢同
風長與少殊如昂如顛溜微生於一髮寄豐壤而數茸
詎擁腫以丐全眇頽波之溶溶厥類茲夥其名曰榕東
魯先生見而笑之曰目無常形嫫母以為能耳無常聲
折揚以為清美醜相乘孰完其生眷茲連蜷棄諸同辭
薪者鄙之斲者訾之輪者絕之器者揮之夫好惡不齊

莫與之爭吾何行焉舉觴以噫噫極而歌歌曰木之詵
詵匪委他兮木之萋萋匪婆娑兮巧為彼矢名為彼戈
徂來維松新甫維栢奈何奈何客有踵門而言曰議物
產者必以良舍所用而求無用將安所向先生曰多謀
者神泣多才者形傷維彼阻窮百虐備嘗蔚然以修充
然以光四海立賢勿云其方窮髮之北殆將駭兮榕兮
榕兮吾以為楷兮

素軒賦

有序

元

袁桷

太原白无咎徵名字于易復以素名軒寔維其祥乞賦
陳郡袁桷賦曰

維太初之混茫兮渺昭質其孰分二儀迭其交媾兮聲
清濁而成文翕九垓其同風兮佩鈞矩以播芬邈焉黃
唐之仁聲兮極黼黻之成憲忠與質其相環兮迄蒼姬
而莫變亘終古之同軌兮成後來者之過眩徵載籍於
竹簡兮淳風鬱然以未墜憫太和之淪胥兮希潔已以
自致三熏沐而揚靈兮儼前聖之遺旨悟宣尼之自筮

兮繇告之以不樂曰丹漆不文兮白玉不琢質不可以
受飾兮道不可以雜敦厚靜止兮弗居其華惟無色而
自色兮物莫能與之加爰錫名以表勵兮雖顛越其靡
他凜世垢之泙忍兮斬旁證以冀直聃演言以清淨兮
戒目盲於五色墨諄諄以兼愛兮悲焚如其何益冕朱
裏而外玄兮袞襲裘而不裼淡玄酒之無和兮輅盡誠
而越席顏執仁以不違兮炯虛室之內煥商起予而舉
隅兮懼絜矜夫倩盼噫童子之微言兮驚曾氏之華睨

拾沐浴以孤泣兮兆有知夫孝子乘結駟以夸容兮終
內熱而殞愧車美澤而可鑑兮曷栖栖夫靡止彼馬師
之食藝兮亦能遺玄黃而洞理羌若人之好修兮姑芳
澤之日恣將乘飛廉以上征兮揚古帝之正則悃悃款
款而彌貞兮固丹府之介特書盤盂以參倚兮慮夫龜
之不食揭嘉名於戶冊兮振白首以莫忒申以辭曰茫
茫重玄物之先兮剛柔相摩文以宣兮反初復真德乃
全兮履素莫渝吾將以無愆兮

靜軒賦 有序

元戴表元

東平閻公名某居靜軒剡源戴表元為之賦曰

世有欲靜者問於其師其師教之以學坐蓋屏居久之
能安於足而不能安於飢窮之水火於是教之以學默
又絕語久之能忘於口而不能忘愛憎之荊棘於是教
之以息交則不能蟄穴而棲巢教之以寡求則不能餐
松而飲流故嵇叟以慕仙傷生楊卿以忤物招咎喑鴈
先盡柔木速朽惡影者走而滋多逃聲者馳而愈有鳴

呼悲夫事有適至理有固然子不觀於空洞渺沒滄溟之淵方其決陰谷瀉層巔經蒼莽而始激觸紫紆而彌喧迨至乎鉅海則沉沉湛湛人莫測其虧全又不觀陰陽四時之去來前者誰挽後者誰推但見河漢烏飛而兔沒草木實落而花開人之營營與識俱生識步而馳識取而爭窮血氣之所趨雖賢愚其同情惟夫大靜之士得智遺智居名避名用能翫外物若蟬蛻戲世好為孩嬰時然後出不得已於出則山搖而岳動時然後處

不得已而處則鵠峙而鸞停時然後默不得已於默則
風收而霆息時然後語不得已於語則玉振而金聲彼
沾沾之小夫與硜硜之俗子勺水盈縮杯羹愠喜間有
聞蘇門而習嘯望箕山而結軌豈不賢於其徒語諸大
人先生之門是猶過蓬萊而誇海市也

可竹軒賦

有序

元戴表元

山陰王理得靜人也嘗築一軒竹間取晉子猷語既名
之以可竹而請問於剡源乃為設客主人問答之詞以

廣其意

客有問可竹之義於王子曰昔子之先瑯琊黃門厭歷
兵革頽頽世紛捐家勲而弗紹欲投好於此君寄廬於
東土譬之一壺之波流然而儕車代翳弛擔揮耰寧館
庖之不繼閱蒼蒨以消憂此其達生幾於柳下憂世近
乎莊周者也今子襲舊德之箕裘耕素封之稼穡傲睨
徐舉優游內息出無蕭朱許史之榮入無研桑陶頓之
役浮毫泛穎沿典溯籍油油乎顏充氣盈華春盛而方

數脩脩乎材堅氣良兵朝餐而待擊雖徵名於古賢亦
取妍於幽植所謂几案之翫階除之飾或可有而可無
非至人之所溺王子聞而歎曰於乎嗟乎是何傷乎蓋
聞事有不期而相役物有適至而為娛客不媿夫重龜
疊組之世崇臺廣榭之區輦千夫以斥苑囊萬金以聘
姝歌喧管咽鐘奔鼓趨乃有下舍一朝之費而耗中人
十家之須觀其睫暈欲寐體疲索扶意昏昏然不接棄
咳唾於須臾至此窮厓之顛絕島之上慘天荒而地寂



四無人以惆悵忽見奇叢異幹瑰質偉狀至戀惜以忘
歸為游揚而詠唱使客評一境之異同較一時之得喪
果孰為之賢愚將悠悠而無當粵吾來於茲土姑無論
乎古先今天殘墟斷礎廢園荒煙因前時之煜煜常櫛
比而雲連雖蒲菊分根於遐徼珊瑚移植於深淵可成
林於談笑何是竹得而侔旃而吾一夫之宅百楹之廬
本先人之遺構匪東郭而開墟賴清陰之見覆幸斤斧
之相疎風春雪臘雨曉晴晡吾試與客振衣坐石攜琴

挈壺醒則行歌商山首陽醉則卧游無懷華胥竹當巖
爾而笑色勃而吁當此之時人可竹歟竹可人乎於是
客主相喻頽然忘言但見脩脩之涼月若迎顧乎前軒

縮軒賦

元戴表元

戴子既為縮軒於剡居之西有客過之哂然而歎曰戴
子將隱乎抑將以為德乎何其志之高而言之謙也戴
子曰不然吾三十年行乎功名之途而涉於是非之林
及今年漸衰而始休業無成而多悔進不能有所為於時

以光宗姻起門祚退不能資其所自力以樹田園活尊
推七暑而一葛十晡而九糜皇皇乎徒勤而無所施荒
荒乎內怵惕而人莫之知支隙巢以竄伏聊憩憊而逃
虛蓋不武以成怯非能高而為卑而何暇於隱何以為
德哉客曰子不觀於南山之熊東海之鯨魚乎夫南山
之熊人知其勇也然而未嘗狎於郊豈不知夫郊之獲
為飽腹哉如使日日而見之則人得以輕其勇矣東海
之鯨魚其怒也能覆千斛之舟習於海者未嘗遇而覆

其舟也今夫能言之士聽先生之說以遊於千萬人之
都與操利業以闖伺於四通八達之市人人志於取也
趨喜而違怒據安而遜危其事良苦矣有一不當意而
無尺寸之地以居其躬子不匿避之而欲以常盛之名
揭乎必趨之衝此豈徒無得而已殆難知其所終故曰
寡求而少願者守身之寶也不爭而善讓者遠災之道
也且夫華燬者老而歸根飾美者勞而返素火以晦傳
燼歷以退合度子毋以昔之揭揭而病今之齷齪安知

非子德之將就而樂其夸也官雖薄猶賢於無名居雖隘猶愈於無家三遇兵而不死一謀歸而就成心懷貞士之操身漏閒民之征一以子為傭胥亦或以為夫一以子為羈雌亦或以為雄熙熙乎蚩蚩乎無譽無讒人不得以錮子之銜無勢無辱天不得以制子之梏子於此猶不足顧今之側肩曲項擎拳累足以求伸者寧得如子之縮乎察子之介介誠有所缺然子且自視孰與古之黔婁姜蕪賢黔婁賢而死不食菜蕪賢而生無炊

子敢望豐衣給食乎哉姑務縮而圖之縮於貲者康縮
於力者強縮於名者良縮於德者百世不忘故今登子
之軒嘉子之誼將濶略乎隘夫曲士之節而盪摩於大
賢君子之事於子何如戴子聞其言始而颯然若無所
容既而渙然以怡矣久而恢然於中忘其居之約而身
之窮也

雪軒賦

有序

元
蒲道源

延祐四年余與牛君楚臣同官於翰林國史院始獲相

識君京師人宰相知其賢而有文以白衣辟用授國史院編修官未幾求去余私謂從君游者檢閱宋文郁曰第語牛先生云今司文柄者徒欲得君之賢以為此職非責以朝夕奔走期會姑少留得俸金以給饘粥可乎文郁以告君曰蒲之意甚厚然吾以早衰不能勉強非不樂此職也但食人之食而不事其事吾不為也遂決辭余聞之深有媿其言暨余承乏國學君使人持雪軒卷求余序引余竊思君之取義於雪其必有深意焉今

試以君平昔觀之則夫雪之皓然一色皎而不汚者庸
非君之潔乎其掩穢覆瑕者庸非君之有容乎其倏然
而集忽爾而釋與時變化者庸非君之出處乎若夫為
來牟之瑞則君子孜孜講學以善及人者可知矣至如
天葩繽紛匪雕匪刻作止踈密飛舞之態而其文章之
妙天機所到非有意而為之者似焉宜君之以雪名軒
而識者亦以為然也向所謂賢而有文與其翻然而去
不以窮達累其心者於茲而益信噫君子樂道人之善

而欲播於歌詠者觀此有以識其大凡云既以為之序
又從而賦之

牛君楚臣以雪名軒太常陳子悉著於篇而又徵文於
余也余掇取陳子之所棄者以為言方其玄冥用事白
晝將夕嚴風乍止同雲全集天花散墜彌望如一飄然
而入吾之戶忽爾而縞吾之室余乃掩闕退處蟄坏其
居蕭蕭騷騷鳴吾竹牕之紙皎皎潔潔映吾几之書
恍虛白之漸生渺俗慮之絕無當此時也或倚團蒲以

聽其聲或據槁梧以觀其色神魂灑然而昭蘇肝膽以之而瑩澈如生乎鴻濛之世與澆風之懸隔如獨立萬物之表蛻垢氛而超邈此伯夷采薇於西山求仁而有得而顏子躬四勿之訓已私之盡克之時也歟噫微斯人而與言啜茗飲以冲默

友筠軒賦

明方孝孺

惟青青之玉立俯漪漪之軒構憩樂矣之幽情處蔚然之深秀蒼雪灑乎涼颼綠陰蔽乎清晝春之時也煖律

乍起和風方剛對穆穆之龍孫列班班之鴈行風節持
以雅素體質直而端莊其夏色也南薰解籜丹鳳來儀
香馥纍纍而貝簇密葉重重而翠圍笙簧弭乎節奏珮
玉鳴乎參差眄佳麗以褒雄據靜便而伏雌若一塵不
到之際萬事脫羈之辰渭川致乎斯景黃岡寓乎此身
風徐來而韶合雨初歇而香勻至若色侵書帙涼溢芳
尊日穿漏以喚金水環迴而漱銀坐擁碧筒之杯地敷
翡翠之褥或彈棊而雅歌或解衣而脫巾或焚香而啜

茗或聯句而鼎真固平生以足樂雖百罰而弗醺越若
秋之與冬金氣肅兮萬木凋玄冥降兮羣陰驍履霜兮
冰將至摧枯拉朽兮焉逃稟抗雪之英姿健凌雲之高
標或強董宣之項或折陶潛之腰或簇白雲之調或作
重華之韶既不婉以不麗亦弗矜而弗驕世上有玉堂
之貴此豈無甕牖之安乃緩步以當車復謝崇而慕閑
彼將聽晨雞而拜楓陛此獨咀明霞而扃柴關忘情於
漢庭之寵避世於商陽之山至於侶魚鰕而友麋鹿豈

復對隆準而瞻龍顏采玉芝於蒼煙之表洗兩耳於清
溪之灣然而清則清矣未有得茲軒之真樂者也詞曰
清清兮歲寒之心溫溫兮琅玕之音君子居之兮實獲
我心俟正命兮履薄臨深君子處兮傷今慨古古人汨
汨兮誰爭子所疏一器兮酒一觴樂以忘憂兮歲月長
羌彼五陵豪富兮乃積乃倉朝重白璧兮莫手粃糠松
花飯兮荷葉衣噴兩耳兮遠是與非朝其遊兮莫而歸
安得從子兮其樂有餘

思歸軒賦

明 王守仁

陽明子之官於虔也解之後喬木蔚然退食而望若處
深麓而遊於其鄉之園也構軒其下而名之曰思歸焉
門人相謂曰歸乎夫子之役役於兵革而沒沒於徽纆
也而靡寒暑焉而靡昏朝焉而髮蕭蕭焉而色焦焦焉
雖其心之固囂囂也而不免於呶呶焉嘒嘒焉亦奚為
乎槁中竭外而徒以勞勞焉為乎哉且長谷之迢迢也
窮林之寥寥也而耕焉而樵焉亦焉往而弗宜矣夫退

身以全節大知也斂德以亨道大時也恬神養性以遊
於造物大熙也又夫子之夙期也而今日之歸又奚以
思為乎哉則又相謂曰夫子之思歸也其亦在陳之懷
歟吾黨之小子其狂且簡俚俚然若瞽之無與偕也非
吾夫子之歸孰從而裁之乎則又相謂曰嗟乎夫子而
得其歸也斯土之人為失其歸矣乎天下之大也而皆
若是焉其誰與為理乎雖然夫子而得其歸也而後得
於道惟夫天下之不得於道也故若是其貿貿夫道得

而志全志全而化理化理而人安則夫斯人之徒亦未
始為不得其歸也而今日之歸又奚疑乎而奚以思為
乎陽明子聞之憮然而歎曰吾思乎吾思乎吾親老矣
而暇以他為乎雖然之言也其始也吾私焉其次也吾
資焉又其次也吾幾焉乃援琴而歌之歌曰歸兮歸兮
又奚疑兮吾行日非兮吾親日衰兮胡不然兮日思兮
旋兮後悔可遷兮歸兮歸兮二三子之言兮

見南軒賦

明
李東陽

若有人兮衡門之下蘭渚之濱體貌質野意象清真植
叢菊兮千株撫孤桐兮五絃朝詠結廬詩暮誦歸來篇
蓋慕陶靖節之爲人也遺世絕俗自稱爲葛天氏民爾
其傲睨江湖逶迤岡阪倚秋旻而長嘯驚落葉之方短
藜杖紆徐其却立芒屨逍遙其未反登西丘而左顧陟
東皋而右盼時宿留以延佇忽南山之在眼澹秋色兮
將夕思美人兮何極瞻孤雲兮歸來與飛鳥兮俱息慨
歲華之遲暮及草木之蕭瑟寄緬懷於太古聊一感於

山色方其嶄巖嵒穹如闕如却弛張廓翕如拱如揖飄
揚兮如驟偃蹇兮如立倏斂藏兮既定渺不知其所入
當予之始遇也俚俚皇皇心志交馳四顧徬徨不暇走
趨俛仰之間萬景畢露披襟一笑傾蓋如故神之既交
窅窅冥冥一塵不干彼此忘形太虛寥寥何物非假隨
所寓託物無不可蓋於是不知山之為山我之為我也
夫物有化機相為終始情感氣應誰之所使出於自然
乃見真爾錦綵之炫爛適足以瞽吾之目笙簧之聒雜

適足以贖吾之耳故達人之放浪獨鍾情於山水而樂水者之動盪又不如樂山者之靜而止也嗚呼南山之閒閒兮繫我之樂不可以言傳南山之默默兮繫我之樂不可以意識彼逆旅之相遭豈茫茫其求索惟物我之無間始忘情於聲色盍反觀乎吾身決天地之充塞彼南山兮何事僅乃胷中之一物

皆山軒賦

明陳璉

二儀氣凝有濁有清濁結為山殊勢異形內遍九有外

極四瀛雖姬轍不得而窮禹載不能盡名惟滁之山雄
冠淮右蜿蜒磅礴儲精毓秀竦拔者為峰為巒欽崙者
為巖為岫尊隆者為嶺為岡坡陀者為陵為阜或翔如
鸞或伏如獸或銳如圭或圓如冑或側如弁或凹如臼
程霞出而姿妍紫煙消而容瘦奇形異態孰得而究至
若空洞而腹稜層而節石結而骨泉流而脈或低而昂
或拱而揖或奔而馳或斷而接其環於滁者幾二百餘
里不翅錦屏張而玉筍列此皆山之大凡也爰有君子

系出延陵家傳詩禮世襲簪纓馳聲華於輦轂著勲業
於明廷司馬政於淮甸友鸞鳳於林扃而乃怡神冲漠
思屏囂誼爰擇勝地爰構高軒以仁為基以智為藩以
義為路以禮為門從而揭以皆山之號盖有取醉翁之
言遂疏泉石遂薙榛菅庭森玉樹砌長芝蘭新雨過而
琅玕淨幽花落而莓苔斑方文牕之洞啟對疊巘之贊
屹空翠飛來几上白雲棲於簷端或拄頰以迎爽氣或
捲簾而縱遐觀或彈琴而招瑞鶴或吹簫而引祥鸞高

情喜乎冲曠雅志樂乎蕭閒著屐嗤乎靈運攜妓鄙乎
謝安若夫萬壑響兮號風千峰靜兮過雨景物佳兮可
人地位高兮如許列詩書兮前楹陳圖史兮東序撫孤
松兮盤桓歌小山兮容與或來山澤之癯或集瀛洲之
侶飲仙露而瀉金莖挹清風而揮玉麈詩成而光奪珠
璣賦就而音諧律呂屏鄭衛之哇淫蹈前修之儀矩此
君子樂皆山之趣有不可得而枚舉也予嘗宴樂軒中
醉而假寐夢乎一人狀如武吏絳衣朱冠持節而至揖

予前曰聞子所賦美則美矣但知其一未知其二我今
告子幸毋為戲滁介江淮山川靈異歷千萬年孰啟其
秘昔晉東征弭節其地琅琊之名遂聞於世爰及李唐
文物斯備贊皇庶子後先繼至山水益佳臺榭崇麗溪
著獨孤之文泉表陽氷之字逮於趙宋治邁於唐山川
勝槩發於歐陽王曾諸公聲名頡頏登臨賦詠泉石有
光或以滁陽之郡號為醉翁之鄉是以皆山之勝聞於
天下故歷世愈久而愈彰逮及皇明密邇京邑鍾山石

城相望咫尺草木增華山川出色矧聖製之載頌著神
龍之靈迹豐碑鎮乎巖巒天章煥乎奎壁是蓋曠前代
所未有而始見於今日也維城西南風氣攸聚爰建太
僕爰啟公署羣圉牧監星列綦布僕臣維賢國馬蕃庶
雖渥洼之產未足以擬其良而麟德之盛不足以方其
數豈徒誇威武之張實可頌國家之富方今聖明御極
德軼唐虞萬邦樂熙皞之化而君子得以擅樂山之娛
况皆山之勝再顯於文明之世而諸公製作不讓唐宋

諸儒豈山川之靈有待而亦氣運之所式符子不於是而賦顧乃於景之撫不亦陋且迂邪予夢既覺恍然如失因述所聞用書軒壁於戲神哉於戲異哉

歲寒軒賦

明陳璉

猗歟美哉歲寒之為軒也去戎衛而匪遙隣公解之伊邇峻宇臨街崇基猶砥文牕洞開遠見百里雖創建之高明較於制而靡侈每肆遐矚足暢幽情羣山獻秀或蒼或青奇形異狀不可得而名惟松與栢近乎簷楹根

蟠厚地樹蔭空庭於是外設絳簾內施棊几爐鑄博山
劍懸秋水蓄鄴侯之書講卻縠之禮延賦詠之鴻儒遠
酣歌之妖妓凡古今之名物亦無求而弗備想夫軒居
整飭松栢蕭森陽烏轉影綠雲布陰苔錦滿地市塵不
侵巢遼海之孤鶴來炎州之珍禽度清風於萬壑激鳴
籟於喬林於斯時也正宜投壺雅歌擊節長吟或鼓曾
點之瑟或操伯牙之琴神境適愜萬慮消沈然則此皆
尋常之樂未足以表歲寒之心也至若萬木號寒窮陰

閉塞臘雪飛璫山川改色郊野斷樵牧之蹤江湖絕禽
鳥之迹百卉以之而摧殘萬彙以之而變易惟松栢之
森然翠盈盈而欲滴於斯時也寄傲軒中或倚或徙醉
飛觴而飲羊羔坐清談而揮麈尾效斯立之吟哦慕田
鸞之服餌因有感於流光復細推於物理何草木之易
零惟松栢之獨美想其為物也受正氣於天地稟精華
於陰陽故能挺生奇質異乎衆芳排九霄之風雲傲嚴
冬之雪霜恬晚節以自高期有用於明堂豈聖人嘗取

以比君子之德而君子亦假歲寒名軒以徜徉者邪辭
曰嚴冬屆兮萬物閉兮雪霰紛紛山川寂寥兮俯仰六
合浩無垠兮維茲嘉植節操堅貞兮共守歲寒以盤桓
兮

江月軒賦

明陳勲

石大夫嘗以清秋之夕與客登金陵諸山以望江渚露
橫波兮如練兔秋毫兮可數瑤為笙兮鼉為鼓江妃歌
兮素娥舞聊一尊兮容與獨懷思乎繫何迢迢兮乃在

乎定水之曲虹崖之阿若有屋兮巖之間被青桂兮垂
女蘿壁龍從以矗立兮流琤琮其在下虹梁雙兮繚之
參差兮車馬滌滌兮石坎漑汨兮龍山盤渦噴瀑不知
其幾萬轉兮波光迴而洲渚出湛深碧之澄瀾浴鳬兮
飛鴛素鱗兮紫蘭舟縱橫而網集倚漁笛於風湍忽東
山之翠嶺躋望舒兮南端馮夷舞於波上捧明珠兮登
玉盤於是空水相鮮素彩浮溢委鑒乎羅幌汎濫乎湘
帙殷霜鐘兮初宵絃鳴琴兮橫膝既而朋好集親懿展

羽爵曹飛玉繩徐轉歌淶水兮思長挹露華兮香遠斯
固已婆娑畢景偃仰窮年爰馳驅之靡息夢故蹊兮依
然客曰昔賢不嘗感夫水與月乎惟觀乎物之外也悟
彼藏之不盡知適我其焉窮今吾未能汴峽浮川過子
之軒而問焉而當其適則無之而非水與月者何必一
壑之美數畝之宮哉乃歌曰滄海一粟寄太空兮水流
月明杳無窮兮將子汗漫游鴻濛兮挾飛仙人御長風
兮焉殫一區勞忡懣兮大夫曰唯唯誠如客言雖然子

蓋有思也昔先祖大夫有廉惠之德施於方州政成乃
老於焉以休予時稚齒從釣游焉亦猶此月色此江流
也昔人詠思祖德至或捧遺研而泣然況乎庭戶陟降
跡往神留者哉客乃爽然盱衡西瞻若有遐企然更為
歌曰山月蒼蒼江涓涓兮長松樛木枝連嫵兮蘭堂桂
牖薜蘿楊兮有偉若人邈而仙兮詒厥繫何簡與編兮
俯仰瞻眺懷斯賢兮大夫敬拜舉酒相屬進牘抽毫以
殿羣玉

方竹軒賦

明金寔

秋孟之夕覺非道人寓宿於主人之軒見植竹焉外方
中堅峭然觚稜扣之如石有聲硜硜予怪其不類衆竹
戲若有評后皇植物各界以形洪纖肥瘠莫殫其名毫
忽無僭若冶剖型爾竹之產為類實繁寄哀瀟湘託興
淇園嶧陽之材聲叶鳴鳳簫簞之堅荆揚效貢黃岡如
椽用代陶瓦簪篠叢生束之盈把由衙雞脰般腸射同
蘇麻篋簞筥算龍鍾體柔為籥節促為簞刃毒為篋依

木為弓毳毛為狗扶老為筇名雖萬變莫不示圓於外而抱虛於中故能文理縝密而節槩疏通迎刃而解落籜以從桃笙蘧笛織翠生風纜維砥柱力綰艤幢干旄子子旌旗蔽空彤管煒煒橫出詞鋒簫韶九奏至和攸同他如器使惟適所逢皆所以弼成人用而翼贊天工者也爾之為質外方內塞肌不柔順性復挺特隳括莫施何堪組織豈非才不適用而名浮其實乎言既而去逡巡就睡夢一玄叟頎然而長雙眉入鬢髦衣無裳頭

角峭厲張立木僵厯階而進出聲琅琅凡今之人喜圓
惡方頃聞誚譏顧不敢當予非舍圓而不居蓋亦天賦
之有常矧夫方圓不侔自昔為訕稀膏棘軸不能獨運
鑿枘異投終底於吝黜直見疏弘詐乃近正論天人江
都遠擯恢諧詭奇金馬日進固知嚮圓以遂私不若執
方而自信也且物生而才罕即安處雕礪斲削自致困
苦樗櫟擁腫斧斤莫尋桐杉楮野枳棘成林天嗇我才
實非我仇以才莫全我獲實優方將勵吾之方堅吾之

塞保天之全資地之力長我兒孫同居壽域邀涼月於
江上疏冷風於座席有愛我者過從成癖敲門竟造不
辨主客札瘥奚生逍遙甚適彼以才而效用於世者自
視於予未知孰得而孰失也予驚而寤萬籟俱寂明月
入戶涼在中島惟見此君挺然於庭粉垣鑄影一塵不
驚修柯滴露鏘然成聲予乃爽然如失惕然而醒乃歌
曰圓以智行兮方以義守智或有窮兮義則可久以虛
而通兮以實而塞通或潰決兮惟塞乃格才應時用兮

拙為世捐用則精弊兮捐則神全竹兮竹兮竹兮子將謂汝
為方兮而不識汝之大圓

聽鶴軒賦

有序

明倪謙

子友郭君彥理曩在南京嘗持聽鶴軒卷索子為賦予
時偕計北上迫於試期不獲遂所請今從親至京復出
此卷示予展視則已為華胄勲衛公所先姑亦效顰於
末非故與之角貴不爽舊約焉耳其辭曰

弭余節於瀛洲兮陪羣仙以遨遊聆天風之下上兮落

欽定四庫全書

御定歷代賦彙
卷八十一


三

清響於高秋靜余武以延竚兮愛餘音之斷續覺塵耳
之頓豁兮澣寒泉於一掬恍羣真之禮極兮鏘珮玉其
琳琅疑鈞天之廣樂兮律協應於宮商道逢余之故友
兮序汾陽之世譜爰傾耳以告余兮斯乃胎禽之送語
曰予嘗慕此兮儼真素之芳容匪吾子之見賞兮孰能
得夫子心之所同嗤粉黛其駢列兮紛擗箏而擊筑拂
梁塵以過行雲兮適足蠶心而蕩目慨風雅於中古兮
曾一聲之莫遺引圓吭以振羽兮若大音之正希繫生

物之有聲兮形氣軋以相成繁噪者亂吾慮兮哀怨者
傷我情惟伯趙之與鷗黃兮肆頰舌其無餘憐燕鴈之
來往兮歎梟獍之不可與居彼雖渠之急難兮羌不可
道也罹鵲鴉以嘵嘵兮又飢艱而莫之好也豈若吾之
仙客兮出青田之世族形厯世以屢變兮壽千齡而不
足養圓顱之渥丹兮曳裳衣之玄縞飲瑤池之玉液兮
啄玄圃之瑤草席威軫之遺慶兮策南征之故勲匪子
晉而莫馭兮宣士衡而得聞夜警露以長鳴兮旦冲霄

而厲翼訪逋老於孤山兮夢坡仙於赤壁心孚契以蘭
臭兮結新盟於歲寒時興逸而起舞兮發鬢尾之清彈
徹塵馬於寥廓兮駭窻雞之辟易諒知音其既覲兮願
療此煙霞之痼疾予聞己以蹶生兮嘉物理之善窮昔
孔聖之耳順兮貴聲入而心通彼鳴皋而聞於天兮固
無微而不灼在陰而子和兮信可縻於好爵睠闔闔其
尺咫兮宜排雲以上呼跨黃樓之六翮兮斫蟾窟之桂
株待震霆之起蟄兮露蘄然之頭角筵鵷鷺之清班兮

接鳳凰於阿閣斯時也余將與子共遊樂於靈囿兮重
聽夫白鳥之嚶嚶



御定歷代賦彙卷八十一

欽定四庫全書

集部
御定歷代賦彙卷八十二

詳校官檢討_臣劉 烜

主事銜_臣徐以坤覆勘

總校官編修_臣王燕緒

校對官編修_臣盧 遂

謄錄監生_臣呂爾禧

欽定四庫全書

御定歷代賦彙卷八十二

室宇

至樂齋賦

有序

宋王十朋

予讀歐陽詩有至哉天下樂終日在書案之句因採其語以名齋又從而賦之

予與客坐於書齋之內客仰而顧俯而笑曰子知天下之樂乎散於事物之萬端會於窮達之兩途然皆有窮

馬吾言而子聽諸高車駟馬腰金曳組前者呵後者衛
士之得志於當時者之樂也然有時而厭焉前日朝廷
之士扁舟去而烟浪深也枕流漱石吟風嘯月採於山
緡於泉士之無求於世者之樂也然有時而改焉前日
山林之士蕙帳空而猿鶴驚也予曰子之言皆外物之
樂也樂果有窮烏知天下有所謂無窮之至樂哉一簞
食一瓢飲顏回之樂也宅一區田一廛揚雄之樂也是
固無心於軒冕亦不放志於山林得乎內而樂乎道也

吾今游心於一齋之內適意乎黃卷之中師顏回友楊
雄遊於斯息於斯天下之至樂也又烏得而能窮

山齋賦有序

宋鄭剛中

觀如居士榜所寓為山齋有叟趨其下仰而笑曰名何
謂是翁號書生頃嘗履玉階之方寸奉天威於咫尺非
山中之人今者囚竄正木偶因漂南冠而繫非愛山之
時前有謝亭長之閣右乃見督郵之縣非居山之地名
何謂趨而出追問之不告觀如感而賦曰

予世居金華赤松之下深林豐草曠野平岡奧而爽動而臧初環翠以通幽鑿嵌巖於邃府忽數峯之拔起入寒翠於穹蒼蓋初平叱石之處孝標讀書之鄉雖雲可耕也類予真之谷口而盤之樂兮亦李愿之太行矣有桑有麻有梨有栗吾非耕而俛俛則灌而搨搨或無餌而釣寒溪或帶經而鋤晚日不知芰製之異乎簪裾不知編茅而類乎營窟挑飛花而送春雪擁門而入室所以鹿豕不驚鳥鳥相得益是山中之一物欺吾者曰為

儒要當釋屣作賦可以得官不牧羊而隨人燒尾何為
守枯槁而遠長安也脫如豹隱豈霧中許久猶未成乎
一斑也盍亦舍蜩飛之控地觀鵬翼之垂天乎聞而甘
之炙背食芹誠忘其陋不謂沐猴之已冠也奈何草茅
之性終在烟霞之痼不痊服勞而力已朽願息而中愈
頑雖侯與伯鷄且特而憂悲眩視此心無一日不在乎
山間果以滄浪不濯之身負藪澤難藏之垢大不足以
禦魑魅之祥小不足以汙豺虎之口風靜雷收天高地

厚爰葺此居使輜百醜蓬蒿兮隱前松筠兮蔽後湖光
兮蕩左江聲兮注右賓客難過於高軒書記不通乎下
走藂第蓁翳崎嶇截業蓋蠻獠洞丁之所雜糅罪戾者
居之不妨戴隆恩於崧岱寄危根於培塿也寂無人聲
柴門晝扃隅坐一窓度秋林之策策如臨萬壑聽風雨
之冥冥埽庸神之滯困對孤爨之餘清盥瓶罍而小汲
雜荼薺以同烹問迷塗於貝葉窺奧義於羲經是皆追
省愆尤収召魂魄處陰休影之地洒心修行之庭彼何

叟也謂吾小齋為無實而名殊不知憂幽之病既定於中州縣在旁何落吾事不須笏以拄頰自披襟乎爽氣故園之夢不生稚子之迎且置惟松楸之悲或感動於造化則首邱而死尚有望於終焉之計

學林賦有序

宋 楊萬里

吾友胡英彥取班孟堅序傳之卒章與黃豫章求益憲下之意命其齋房曰學林誠齋野客楊萬里為賦之其辭曰

學林先生宇宙一室書冊永日江聲山影排戶而願交
詩臞書癡牢關而不出客有念其幽獨者闖然詣之仰
瞻其玄霧之中則垢以銖兩計也俯視其烏皮之几則
埃以分寸量也客意若不釋然者而問先生曰子奚若
是哉癡臞之為雙埃垢之為鄉世與子忘乎子與世忘
邪先生塊然若不聞者徐顧客曰子可與談乎俄掀袖
而奮袖粲玉齒之有光源以開闢波以帝皇幽以天緯
焯以人綱胜以虞初之破碎粹以東家之文章初松風

而澗水忽玉磬而金簧客驚而自失曰吾鄉也病子吾
今也敬子子殆近於道者耶不然何癡於今而黠於古
歟何臞於貌而腴於文歟何埃其几而不埃其心歟何
垢其中而不垢其德歟子殆近於道者也雖然子之幽
且遐者吾不能以問子子亦不能以告我也願問其膚
而已吾聞檀栢有鄉不明不植也玉石有琢不友不益
也今子也十趾之下無百里之厯兩耳之實無單辭之
獲則子也既絕學乎諒直矣不幾於不羽而翔書囿不

脛而趨聖域哉此吾之所以不惑而不得也先生曰非
竹實林惟書為林今吾百聖之與居羣書之與曹蓋終
日揖遜其間之不暇子猶病吾虛空之逃耶客聞而悟
出而喜謂其人曰吾有聞矣吾有聞矣其人曰子焉聞
此客曰吾聞之學林之叟學林之叟聞之小德之父小
德之父聞之叔皮之子

新齋賦有序

元
元好問

予既罷內鄉出居縣東南白鹿原結茅菊水之上聚書

而讀之其久也優柔厭飫若有所得以為平生未嘗學而學於是乎始乃名所居為新齋且為賦以自警其辭曰

新之為說也在金曰從革在木曰從斤邱陵為山而惡乎畫履霜堅冰而致於馴猶之於人則齊魯有一再之漸狂聖由念否之分唯夫寄一而不變者不足以語變化之為神拊陳迹以息觀博吾事之良勤失壯歲於俯仰竟四十而無聞聖謨洋洋善誨循循出處語默之所

依性命道德之所存有三年之至穀有一日之歸仁動
可以周萬物而濟天下靜可以崇高節而抗浮雲曾出
此之不知乃角逐乎空文偃北轅以適楚將疇問而知
津揜虛名以自夸適以增頑而益囂我卜我居於浙之
濱方處陰以休影思沐德而澡身蓋嘗論之生而知困
而學固等級之不躡憤則啟悻則發亦愚智之所均齋
戒沐浴惡人可以祀上帝潔己以進童子可以遊聖門
顧年歲之未暮豈終老乎凡民已焉哉孰糟粕之弗醇

孰土苴之弗真孰味爽之弗旦孰悴槁之弗春人安知
溫故知新與夫去故之新他日不為日新又新日日新
之新乎

行齋賦有序

元
元好問

戊子冬十月長壽新居成仲經張君從予卜鄰得王氏
之敗屋焉環堵蕭然不蔽風日君為之補罅漏治蕪穢
葢十日而後可居葺門圭竇故事畢舉取君子素其位
而行之義名曰行齋而乞文於予予以為士之貧至於

君極矣無祿以為養無田以為食無僮僕為之負販無子弟為之奔走無好事者為之謀緩急而助薄少率資無旬日計泰然以閉戶讀書為業不以為失次而以為當然不以為怨不以為憂而又且以為樂也然則不謂之無媿其名也而可乎迺為賦云

賦分在人如物有常反鶴與鳧無益短長力有可求勝天不祥福不盈睫一敗莫償莫難養心操存舍亡出入無時兮莫知其鄉飽飢有時而激兮怒殆豢虎之貽殃

我思古人動靜有方靜以養虛剛以作強辱以處汙愚
以退藏屹中立而不倚邈橫潰而獨障直釣磻溪之魚
禿節單于之羊有漆身以為癘有披髮而為狂仕汙世
而執翻狗殊俗而解裳太阿存兼善之達緼袍有不求
之臧唯夫長劍大冠以揖讓人主之前者若固有故木
食澗飲雖至於勞筋骨而餓體膚者為無傷古有之居
不隱者志不廣身不抑者志不揚士固有遯世而不復
見然愈揜而愈彰南山蒼蒼北風雨霜有蘭不凋俟春

而芳偉哉造物又將發吾子之幽光耶

餘閒齋賦

元 袁 桷

曷不觀夫農夫之治田春耕夏耘晝作夜緝望歲常有
思憫苗若不及候其陰晴謹其涼熱食不滿噉目不承
睫穡事告成以祀以享入此室處曰余將有養休其四
肢里閭熙熙甕牖迎陽茲其為一歲之隙得以自怡者
歟古之志士範圍天地之初冥搜密籌心如淵珠據會
以集要積神以合虛冬爐夏葛謝而勿居逮其蓄極以

通若燭計龜卜物莫能沮燕居申申欲不踰矩倚門而
歌聲裂金石恢乎其有容順化而有得益其勤者若此
則其終也乃以豫佚惟昔賢之肥遯屹乎其頽波青林
扶疎擢茲瓊柯味道以觀淡乎不頗閱世推移飲茲無
何養其粹精不激不阿有客仰止撫其嘉名以處以息
慨然而言曰悲濁垢之駢臻御吾輪兮焉窮愍遂日以
道死異惜陰之度功厥令金馬公車履舄接踵承色以
求為疲為冗退食以休濯其靈根藏真養恬疏清滌煩

庸式庸似著於門顏維四民之有制實士農之居先情
於初者躋於後獎於智者懼於艱歸休乎君援琴而歌
曰羣動兮夜息貿貿兮吾徒曷猖恣不能以自適書兮
在度寧兮在席復吾初兮以無忒

息齋賦

元 表 桐

慨太素之日凋服仁義者亦幾乎外馳百幻眩晃衆愛
糾縻側身於積薪之上試命於累卵之危髮盡化而齒
將終竟不得要領以自持端木之智工於言結駟之德

色索其中誠餒然也史遷之足老於行悲憤之書不能以全其生也東門之悔華亭之悲是猶碎轂而大幅掘泉而止渴何其遲也古之至人止於其所不止休於其所不休兢兢惕惕不得而名之強名曰息夫息形者神清息事者愚絕息心者心愈馳息名者名愈徹莊周之息影為荒唐陶潛之息交為慨慷是皆未得其當若然者其必有自息之方夫知古而不知今謂之陸沈世故之岐多人事之機深生乎下都兮又安能超舉以絕塵

維李侯之靜好藹鄒魯之淳風不求異乎人默息以底於鴻濛振纓而趨簿領如琴上下雜糅否臧混淪一息而求之何異解牛之銚刃眇目於毫分也退居申申圖書領賓不喜不愠寂然含珍吾有以知其息之外陳者矣夫天地之理動靜濟焉偏一而用則為五行之沴人身之氣如車軸窒而不流則為疾癘為末廢若侯者其何以為息之體而余以為外陳者豈侯之意與他年成功而歸晞髮於彭咸洗耳於箕潁味乾健之旨以極君

子之理吾不知侯之所為息者其信然耶其寓言耶

息齋賦

有序

元戴表元

薊邱李仲賓郎中風流博雅經濟人也而好世外之學
盛年華士風度瀟然異時嘗以息名齋屬剡源戴子賦
之賦曰

薊邱之陽有一人焉非隱非吏不儒不仙手握昭回之
章口誦逍遙之篇跨鴻濛抗青雲同遊星辰動握天鈞
蓋其道術既超乎物表而名跡未離乎人羣者也翫大

化之所趨悟浮生之無窮寄百世於須臾期已息乎心
躬曰何行而非家雖囂隘而能容噫嘻乎子獨不觀之
水上之漚乎謂水息而為漚則浮然而流不知其休謂
漚息而為水則波然而起不知其已是水與漚皆非所
以息也又不觀之木與風乎風欲息而木窾之鳴木欲
息而風撓之零謂風累木風無形謂木累風木無聲是
木與風皆非所以息也今夫人之居世何以異於水漚
風木之相遭雞鳴而起百體皆勞彼求息乎夢寐則有

誤飲食於田獵惑錢財於糞穢彼求息乎老耄則有聞
鳴鐘而不休思秉燭以繼照志燕者息燕不息燕者益
北其轅志越者息越不息越者愈南其轅人有常言貧
者欲富富者欲貴貴者欲不死彼達者姑舍是無辱無
榮無死無生以入於不爭鬼神莫之敢櫻若是不既息
乎而山中之鳥或以啗烹潛居淵觀或走而驚彼猶未
逃乎實與名邪故有南華憺恍之裔西方奇詭之倫捐
有說幻梯空談真凡皆客所未喻吾將叩之其人

容容齋賦 有序

元戴表元

東平徐公書燕居之齋曰容容剡源戴表元嘗過之問
曰是非漢人之所云白璧不可為者邪公曰不然因擬
其意作容容齋賦久不即就而公歸東平懷感舊話不
敢負言乃為賦曰

大智幽小智仇機鳴轍空萬類一邱厥有黃髮真逸青
雲雋遊偃駕於希夷之林濯纓於清泠之流笑衆雛之
相役弛然示之以無求始其昂頭瞠目驕面怒腹咸崢

嶸以思逞如不盈其所欲既靜矣以自休亦逡巡而心
伏故力敵者攻勢兼者雄才十百者不强而從量千萬
者容之又容升容於斗釜容於庾舉而投之太倉不知
其有濶容於谷湖容於瀆輸而寫之滄海不知其足豐
狐之擇燠乾鵲之違風知陵阿叢薄之功而不知託氣
於太空海鵬息以六月澤龍神於勺水脩脩乎知太空
之容已而不知太空之所倚物之相容何有窮已昔者
周公端揆日容千士仲尼閒居容七十子當其垂紳端

委擎拳曲跽前俞後唯而不為之喜及乎危疑轉徙詩
鴟鵂歌虎兕風披雨圯亦無所毀第汎汎而容之遺簪
墜履殘籩賸簋或聞風披靡或承流迤邐不知其幾蓋
何必家陳羔雉之贄人擁軒車之華而誰不曰我嘗趨
明堂而遊闕里彼有託一時之喜事誇四海之龍門侈
公孫之華館開文舉之芳樽唾面教忍佩韋矯溫所謂
擬富於聯珠之室衍明於扶桑之暉吁嗟乎獲容於人
則幸爾烏足以盡彼我之所存

寄安齋賦

元戴表元

智安於無疑勇安於不怵廉安於傲貧讓安於不屈內
恕者安於寡言達權者安於簡出乃有至人行無朋徒
止無居室忽焉禮之以衣冠鐘鼓而不知為衣冠鐘鼓
猝然辱之以泥途袒裼而不知其為泥途袒裼故能除
藩去蔽剖觚破鐻動如大鵬飛揚振迅寄迹於八荒靜
如神龍收潛變化奇形於一物彼拘拘者方欲與之商
行藏籌語默宜乎叔孫見笑於兩生楚龔之徒聞老翁

之風而自失也

木齋賦有序

元虞集

奎章閣藝文監秀才方積昔在匡廬讀書羣木之間謂之木齋余愛其高秀而賦之其辭曰

夫何碑斲以嵯峨兮據積水而鬱盤有榲楠與豫章兮翳松柏之九九攬芳草之盈庭兮聽呦呦之鳴鹿濯余纓於滄浪兮沐余髮乎飛瀑余潔清以有待兮歎望之而彌高絪余驂以弗馳兮氣絳薄而心勞感春物之芳

迄兮又晚實之不食更千歲其未已兮退自脩乎茲室

存存齋賦

元危素

繫太極之混淪兮為生化之本根維二氣之闔闢兮暢
萬物之滋蕃羌易道之廣大兮備吾身於乾坤極知崇
以效天兮循禮卑而法地體成性之存存兮由道義之
不匱信弛張之靡忒兮亦柔剛之相濟偉鄒孟之崛起
兮當戰國之兵爭悼民心之迷繆兮揭皇極而載明謂
君子之善存兮異羽毛之頑冥彼鬼瑣之紛紛兮遂枯

亡於外誘湛明鏡之當臺兮竟皆蒙於塵垢蔚嘉穀之
羅生兮胡雜糅於稂莠懷咎繇之苗裔兮蚤奮迹於滕
邦炯冰壺之交映兮粹白璧之無雙翫元理於簡冊兮
驅長才於海江爰校書於史館兮持憲度於臺閣善和
變於羣情兮或閭閻而謬謬沛大旱之甘霖兮蘇八紘
之毒蠱退休沐而齋居兮撫易象而觀天亶存存之不
息兮契洙泗之心傳雖首路之邈悠兮奚白首而不遷
憶旋輶於虎林兮卻傾蓋於京闕瞻雲霄之軒翥兮莫

策厲於駑劣葆貞白於歲晏兮追往行於前哲樂几筵
之潔清兮陳左圖而右書殖卉木之芬芳兮啟韋編而
載愉託中情於藻翰兮著懿戒於座右

真賞齋賦有序

明豐道生

夫人所以參列兩間優游沒齒莫不應務彰性接物萌
情適體求充委時感興固有乘風雲以騁志附龍鳳以
效能或載筆於鴻闥或假鉞於虎閭又有華轂日擊錦
帳雲連蛾眉擁於後先鷺羽忘其冬夏又有取穀出絮

執籤鑽李朽貫不忘虞躬滿羸惟圖裕後衆之所趨區
以別矣揆厥心賞何者為真錫山東沙華子貞孝之肩
藝文之英倣儻卓犖之懷弘廓瓌瑋之器等勲業於浮
雲視侈富如土苴爰購齋居惟貯圖典六經之籍諸儒
之論歷代之史百氏之言周秦漢魏之書晉唐宋元之
繪固已盈几溢奩兼輪壓棟至於藻鑑所注神情所鍾
性命可輕頭目同寶則有鍾元常季直表貞觀之所珍
藏也王右軍袁生帖祐陵之所眷題也顏魯公劉中使

帖及朱巨川誥宣和之所譜藏也王方慶通天進帖金輪之所揭翫也永興汝南季海道德楷法矜於海岳子山步虛康樂二贊草聖擬於季真右丞輞川圖珍聲萬代恕先雪江卷寶著前朝君謨留精於數牘魯直擅美於五書高宗居九重而臨寫奪真忠穆挺大節而辭札更雅米兵部瀟湘景若就楚江閣次平積雪圖頓忘三伏松年九老院體一空馬麟四梅家法咸具趙承旨臨書入二王之室諸圖鼓盛唐之風邵菴蚊賦具體虞褚

彥敬雲山同趣襄陽叔明青卞隱居小幀元鎮惠山春
霽等幅飄蕭溟滓之表鏗鏘倡和之音又若壇山大篆
鴻都石經夏承婁壽漢碑樂毅東方晉刻黃絹換鶯古
題具在予敬植賦全本僅存淳化祖刻朱書見元祐之
傳太清嗣摹墨彩乃大觀之舊暨乎劉氏史通元臺新
詠則南唐之初梓也聶崇義三禮圖俞言等五經圖說
乃北宋之精帙也荀悅前漢紀袁宏後漢紀嘉史久遺
許嵩建康錄陸游南唐書載紀攸罕宋批周禮五采如

新古註九經南雍多闕蘇子容儀象法要函稱於諸子
張彥遠名畫記鑒收於子昂相臺岳氏左傳建安黃善
夫史記六臣註文選郭知達集註杜工部詩曾南豐序
次李翰林集五百家註韓柳文劉賓客集白氏長慶集
歐陽家藏集三蘇全集王臨川集管子韓非三國志鮑
參軍集花間集雲溪友議詩話總龜經鉏堂雜志金石
畧寶晉山林拾遺東觀餘論唐名畫錄五代名畫補宋
名畫評蘭亭考皆傳自宋元遠有端緒牙籤錦笈以為

藏天球河圖而比重是以太史李文正公八分題扁曰
真賞齋真則心目俱洞賞則神境雙融翰林文公為圖
為銘昭其趣也昔張彥遠弱年鳩集晝夜精勤或嗤其
為無益之事則安能悅有涯之生貨衣減糲篤好成癖
以千乘為輕以一瓢為適米元章每得一書既窮其趣
輒以良日手自背洗客拱而後示屢濯而後展諦觀之
際迅雷不聞與夫褚中令鑒定若視黑白黃長審辨證
不漏毫髮揆茲雅抱千載同符斯東沙子所以淹留歲

時兩忘憂樂眇萬物而無累超四海而特行者乎華之
先晉孝子國史有傳下逮有宋將仕公克振其家趙文
敏表其墓監稅公以善化俗揭文安銘其墓德珍處士
堅辭總管黃文獻等稱之子舉都事自奮功名文獻復
誌之厥配陳節婦堂有名公不一之書其孤棲碧翁軒
有文儒相繼之作貞固翁輯行家禮著於文同之傳源
長翁割股活親顯於傳芳之集以烈婦名者翁室鄒忠
公之裔也以存思詠者翁子守德孫廷元之孝也南坡

君遜業以成其義則喬太宰呂宗伯鄒司成之言可考
錢碩人備德以相其夫則王特進吳文端文衡山之筆
有徵東沙子之先妣呂亦有衡翁之筆誌矣凡此高文
鉅冊照映齋中則又華氏寶玉大弓子姓世守當傳無
窮以為衡鑑匪特翫好之供者猗嗟懋哉東沙子夏字
曰中甫余交其人僅垂三紀知其志乎古不同乎今也
爰作賦曰

有清華公子謁乎素履山人曰蓋聞九陔倚杵十形冰

塊跳丸往來編珠縈帶二氣運其良能五行儲其靈粹
山川通其竅液動植紛其恢詭於是乎人也稟至貴以
含生超衆靈以成性萬色歸乎善視萬聲攝乎善聽臭
既別乎芳穢味亦甄乎邪正紛能言以能行乃時動而
時靜其所以役其心思充其口體者蓋隨感以有觸或
無涯而求騁聖王有作以道裁成勸之以爵賞董之以
威刑民知向違咸樂其生羸劉而降暨我皇明治忽迭
易歷數幾更神帝嘉靖弘厥昇平農服於野商踵於塗

工竭其巧兵寢於隅當是時也有志之士固有應六符
法三光橫玉麟飫黃封撫華夷變陰陽哂蕭魏而弗齒
晚伊旦而與仇復有元勲世胄倚葭托肺丹書帶礪乎
河山金貂趨蹌乎禁衛爾乃相天時占星紀開阡陌制
耒耜耕耨以時刈獲必倍若干若億為倉為積或擅丹
穴或儲紫貝量畜以谷閉門成市沉腦塗牆文繡被地
玄妻素娥弄玉飛瓊之儔便娟巧麗顰睂目取憐乎
左右戲魚龍而舞柘枝詠明月而歌百歲鐘鼓瑩篴簫

竽之音鐘鞀乎晝夜喧闐乎閭里所以快耳目而娛心
志者亦足以稱豪於一時而不遂汶汶於斯世者也吾
聞錫山有東沙子者雋偉人也粵其上世義熙維寶始
居慧山華里稱孝宋遷隆亭原泉則肇夷逃而華振業
孔耀鷺津洋洋喬木杲杲節義之傳詩禮之教簪紱蟬
聯蘭玉滋茂迺東沙子靡諧厥好蕭然一齋自樂其道
胡於斯際匪則匪傲上之不聞出才智佐明時以芥拾
乎青紫下之不聞友豪俠置聲色以酣樂乎桑榆中又

不屑廣田宅殖貨賄以貽裕乎裔胄其於世也若或醜
之其於古也若或糾之自在幼壯至於父矣頽然泊然
不易厥守意其性爾殊乎抑無見乎聲利之微歟蒙疑
不釋願就正乎有道素履山人默然不應瞿然直視已
乃啞然而笑曰咈哉噫嘻子蓋未達乎真賞之趣也天
地變化陰陽乘除曲成萬物理一分殊或清或濁各適
其趨情別淑慝性分哲愚方正其俗人十其區玉不火
燼金不土渝柏不霜摧橘不准踰谿汶而斃蘭圃而枯

薦嗜麋鹿帶甘即且物則有然而況於人乎宜于於此
心猶豫而口噤嚅也且東沙子之賞真矣所得深矣請
次第而宣之典午陽九豪沒於戍子憶父言老不冠娶
既悲罔極亦傷國步終孝全忠克承厥譽弟嗣有傳慧
麓延緒南北屢遷逮乎炎渡君選友聞德珍子舉配陳
貞節勝國表著栖碧奉母堂軒是署貞固焚避國初定
處乃經故莊佳氣鬱聚遺命克遵後昆斯裕翫易吟詩
蟬蛻鳴翥精誠動神明儀範昭士庶義烈維鄒存思弗

惜南坡孝友期熙繩矩希翁之媳媿德二姪是鞠中甫
敏而稽古其始也岐嶷秀穎成童耿介志超萬物之表
心遊六藝之內諗佳頌之雍皞觀國風之成敗兼魯韓
之旁博貫毛鄭之專治集歐王之新奇析朱呂之精粹
抽密義於繭絲振金石之清籟翫象辭於三聖誦典訓
於四代嗜孔樂於姬文審顧答於回賜明仁義於鄒與
談荒唐於莊惠伯陽尚其玄虛禦寇逞其恣睢孫吳備
其奇詐管商顯其功利申韓忍於刻核屈宋陳其諷刺

賈董敷其治策馬揚逞其詭麗遷固擬於春秋潘陸方
於江海燕許誇其手筆李杜稱其雄偉王孟咏其幽雅
儲韋味其清冽韓柳宗其典則曾蘇羨其汪沛以至岐
黃之濟世曇摩之似是百家之殊途九流之異派靡不
辨其瑕瑜導其肯綮飫其膏腴嘖其骨髓既填胸兮通
理及援毫而吐思乍雲蒸而霞纈或川流以山峙發朝
芳之芬葩謝夕叢之腓瘁軒乎蜩騰而獸駭翩兮鶴舞
而鴻跂明揚文武經緯之畧微闡天命性情之懿上敷

帝王修治之範下述閭閻阡陌之弊搜羅匪漏傾瀉無
滯準古繩今規人矩世舉而措之固將黼黻乎皇猷而
康濟乎品彙者也若乃締金盟啟蘭室合志方營道術
濟脣齒染藍赤交以淡成言以忘得二泉師友乎希翁
乃忘年乎膠漆南濠耽樂於圖書爰同趣乎米薛涇野
忠直振時而健羨乎壽席南原廉介絕俗而劇談乎日
夕衡山耆德而文重乎釣石東郭同門而追宗於淑實
瓦屋高簡而萬里致叅同之益媿吾英爽而舊京賞蘭

亭之蹟石亭留夜坐之圖林屋灑雞鳴之墨資五嶽之
麗藻契蘿石之間逸樂何王之雄俊取月泉之空寂相
與切磨其功講習其業文會輔仁威儀是攝猶以為未
足也白巖先生敦龐植性希叔旦之碩膚儕孔明之水
鏡庶稚圭之無我齊君實之守正陽明夫子心學希聖
超訓詁於闢闔悟存養於曾孟播直聲於善感邁成功
於李晟間氣之所鍾人望之所凝英才之所樂育曲木
之所就正於焉鼓篋而行泛舟東競樞衣必慎執經求

證學究淵源道廓蹊徑通於常變達於義命此其志豈
效為我以自私曾無與乎天下之利病者哉嗟乎鞀鼓
聲微吐握人邁顏異遭三卞和刖再寧人事之弗臧將
天命之有在是故伯樂恩深令伯情至元卿嚙指曹休
垂涕臧循倉皇以無寢司馬徘徊而不對此東沙子之
所以傷乎內也務光抱石魯連蹈海文舉樽空侯芭席
敝子期賦於感音希範思乎絕藝此東沙子之所以感
乎外也夫庶務前焚則清虛弗來七情中擾則衰白馴

致易不云乎知進退存亡而不失其正也夫子亦云道
之將行也與命也道之將廢也與命也君子知命亦審
其進退而胡物之競矣爾乃闢故址開三徑建新齋閔
幽境珉礧平柏栢挺朱牕明素壁淨松關邃芝房迴縣
李書原米名梧陰垂砌荷香滿庭太湖靈壁英山武康
錦川之石霞湧浪積鳥棲獸躑蛟旋魚躍菌秀英圻若
醉若舞若戲若或瞽瞍紫虎容從紆譎紛員分庭實龍
髯之松瓔珞之柏彌勒之竹合歡之橘丹桂青桐玉蘭

木筆碧桃紅梅海棠朱楔紫蕙黃薇末麗杜若荼蘼瑞
香水仙天棘宜男午葵桃黃紅藥昌陽日精鵲花瞿麥
或蔭修除或森間隙欒危發翫薊菰呿吟猗杞的皤蓂
楸芬萃凝甘露兮揚清颺蔽炎暉兮延皓月巢鸞鶴兮
遊文魚噪寒蟬兮吟蟋蟀東沙子於是埽絕煩囂獨怡
岑靜巷無車馬之音庭鮮襟裾之影置軒轅之棐几拭
殷侯之金鼎熬旃檀之珍香俯汝官之陶皿滌端州之
紫硯列點蒼之秀屏佩不衰之漢熊握如脂之古印被

銖衣之翩翩啟瓊笈之縵縵昔者周穆巡狩至於壇山
吉日癸巳親題石間弩張劍拔虎跳龍盤通古卧車而
心悟中枯龕壁而跋存雖贊皇之未泯緊古意之邈然
茲僅見乎齋中蓋唐宋之所傳漢世隆儒六經是訂邕
立典賜八分稱聖武定遷鄴而半沉貞觀寶墨而獨進
矧蓬萊之摹本亦亡滅而莫問幸百許之遺文諒蚪驪
之堪並銘石之楷魏首元常幽深絕世古雅無方悵敬
仁之俱逝訝宣和之搨藏薦賢表乎季直纂要紀乎士

行煥貞淳之寶印遺照乘之夜光草書之極晉惟逸少
至聖大成形神俱妙彼王著之摹刻徒肉勝之遺諸洛
表生之真墨徵八璽之見耀矧祐陵之金題覩孤鳳之
縹緲方慶臣壘文獻仍孫廓填鑑影郢人運斤信得門
而窺奧豈虎賁之旁樽始金輪之辱序終倦翁之見珍
况棲碧之手澤幸青氈之得人初學詩贊編聯庾謝綵
牋古色仙蹤疇亞曄霓裳兮逍遙絢春林兮布濩想投
跡於虛空殆爭工乎造化閱神龍而流芳載書譜而增

價偉哉魯公忠誠川流正擬劍鋒行超篆籀慰瀛磁之
既平凜英風之發秀燦碧牋兮宜墨駭龍蛇兮奔驟歷
七君之品題實諸帖之領袖矯然季海楷法稱雄怒猊
渴驥父王祖鍾述老彭之玄訓準樂毅之奇蹤爛玄真
之丹識縟黃素兮金龍延之證其第一原功詫其難能
乃若高人摩詰前身畫師家輞川之幽勝寫詩境之瑰
奇山盤紆兮挾霧林蹇嶮而藏暉水揚穀而渺渺雪篴
粉以霏霏斯景玄之攸錄乃天府之所詒狂仙忠恕尤

妙書法委羈宦而肥遯狀江行之霽雪景緊緊兮靈深
波粼粼兮澌滑滄坎廩兮擁袂舟凌兢兮礙杙紛倡和
之琳琅允諺詡之昭揭五季書亡君謨聿興世方宗其
楷法妙實在乎真行詠山堂之秀句陳子發之至情啟
評事而端謹示新記乎崢嶸統二八之並美標五子之
題名元豐彌文豫章獨步變行楷於清臣習顛草於懷
素伏波稱其神偉諸座資其頓悟尺牘表其妍姿舊遊
發其豪趣晚顏蔡而追隨軼蘇米而不顧思陵南渡繼

體道君當金戈之倥傯乃留意於斯文忽神遊今天上
遂手追乎右軍皎翔鸞之舞鏡邈羣鴈之凌雲奉華拜
乎嘉錫亨貞品其入神元暉克肖構堂海岳行書賞於
光堯戲墨貴於京洛思襄陽之舊遊顧瀟湘之是貌藹
晴雨之變幻縱天真之揮霍象內則晦翁屢題畫表則
子言斯度次平畫院髣髴李唐兼承直之家傳殆出藍
之擅長當阜陵之辛丑灑積雪於迴岡風隨盼而忽暝
墨深黑而流光恍三伏之全失凜瑠璃之對牕魏國王

孫神仙玉倚灑翰齊乎王鍾繪事超乎韓李經賦宛其
神傳山水怡然天解塞翁讓其三百暮江望其千里洗
晚宋之衰蕭為來世之模楷至於淳化祖刻則廷珪墨
色之古銀錠棗木之紋坡老硃書之辨趙公姓印之文
啟明向曙離劍還津較之師旦子明之刻次莊希白之
臨烏鎮福清之勒武岡東庫之分精粗迥別不可得而
並論焉小楷諸帖則樂毅元刻之真朔贊初鐫之勝黃
庭遺字之精洛神全賦之夏尺璧斯陳懸黎孤映與夫

虞之破邪歐之白鹿心經褚之陰符度人柳之尊勝清
淨金生玉潤咸可得而繼稱焉蓋游藝以依仁寧翫物
而徇欲飲沆瀣以吸朝霞沐咸池兮浴暘谷乘野馬兮
遊泰初班由夷兮謁荼侂量古今於一瞬覽宇宙於圭
竇心澹澹兮坐忘行踽踽兮背俗聊栖遲以容與每遇
意而自足所謂皜然蟬蛻浮游塵垢之外離人而立於
獨者非邪言未既公子憮然而歎逡巡而避山人曰皖
皖斯風乃炎崑崙涓涓斯濬乃瀾江河神明既啟麓穢

則那公子居矣吾將授子以皓天之歌歌曰皓天明明
森成性兮迷亡徇物孰知正兮福輕乎羽舉孰先兮覺
重乎地避孰全兮息交絕游閒齋中兮厥心冥冥若虛
空兮左圖右書瞰煙雲兮日月逝矣公子聞之渙然顙
泚下席而拜起而稱曰鄙人顙蒙溺乎荒俗之趣未聞
大道之旨者也幸夫子迪我若發矇矣願卒業為弟子
乃賡之以中邱之歌歌曰相彼中邱勃萃壤兮行潦橫
集又莽霜兮脂車結駟天貿貿兮日昃之離鏗鼓缶兮

無累之人迴絕代兮弟子釋疑真賞泰兮大夫能賦照
中甫兮琢珉龕齋俾無數兮

漱玉齋賦有序

明 鄧雲霄

余憶家食時彈琴齋頭入吾室者明月清風與吾盟者
海鷗漁父服食求仙意氣霞舉今十年浪出一官無成
頭顱可知拙宦自厭思欲抱犢故山唾棄難肋追叙昔
日聊抒懣懷敢告山靈訂言此賦夫小園見子山之高
閑居識安仁之逸余雖蕪陋遠遜古人至若適志自喻

其旨則一誦之猶帶煙霞氣也

天鏡先生抗心雲際盡排冥筌與道合契枕黃庭於山齋專服食以忘世其為居也幽踰鄭谷僻若蘇門羅浮北戶勾漏東鄰絕堊墁以示素剖藩籬以全真階列忘憂之草壁挂無絃之琴支牀有龜應門有鶴鹿為銜花兔供擣藥石掩雲關畫無剝啄松醪初漉香積廚清更檢囊中祕法得漱玉之真經刀圭入口骨換身輕因以漱玉顏齋招邀仙侶息踵塞兌塊然獨處問奇之屢常

滿罕十謁而一遇於是和光子怪其迂誕過而問焉捫
厯深阻步頓屢坐穿溪度竹迷右失左偶遇山童披煙
掣鎖主人方卧無為之牀醉羣玉之漿傲羲皇對蒙莊
游於枕霞化蝶同翔和光子順風疾呼再拜而請曰吾
聞通人不滯於物茅靡波流與世汨沒追歡窮年騁奢
卑日封檀銅山家藏金穴食有鳴鐘之饌馳必鋪錢之
埒適志澤體靡不愉悅今子癯形陋室枯坐空山食淡
攻苦期覓大還徒自濡涎蝸角浪稱脫屣人間成丹幾

時雙鬢虛斑且子溪無神漢之泉居類愚公之谷窺之
止存四壁量之不滿十笏菹菜當鮭噉噉於腹何取斯
義而名漱玉主人若醒未醒似聽非聽偃仰欠伸徐徐
出定目招客曰子其來而不見瑞圖之甕西湖之杯其
光湛湛甘美如醅又不見昌城之蕊長洲之英釀為膏
液醉入蓬瀛寶屑曾霏金掌真方久閱珠庭豈止辟邪
滅癥用以和神潤鬼非貢之於于闐非獻之於鞮鞢種
不由於羊公藏竟異於張伯蓋峯山開而五色現丹水

澄而五味發余鍊以軒轅之鼎承以優曇之盂一漱而
黃芽長再漱而白虹舒截肪蒸栗其味焉如故陋齋或
笑於田父而瓊漿已重夫五都子徒慕洛陽名園道南
大宅侈樊重之軒麗鄙晏嬰之狹窄安知高明鬼瞰盛
滿神殃鳥散梁家池館狐啼霍氏門牆沉酣狂藥寢息
柔鄉歌聲未歇弔者在堂嗜之如烏鳶之腐鼠穢哉同
糞土之蛄蜣豈若煖眠鍛竈遁跡鑿坯巢父之巢出入
壺公之壺往來雉不驚羅蟬欣得翳樗以不材全身桂

以餘香自斃吾且棲遲茅屋嘯詠雲窩三徑之蒿雖滿
一瓢之樂已多足戒路於亡羊心捐情夫害馬愧北山
之移文恥終南而索價有溪不以釣璜惟漱玉而休暇
彼王喬與子晉時騎鶴而來下悠悠人世劫火易灰螻
蛄吟松安見樹摧歲云暮矣子盍歸來於是和光子聞
之驚若鷄居顏色沮喪却步反走越階而降主人開簾
明月正上

御定歷代賦彙卷八十二